

## *“A su Canonigu Cadeddu”*

*Fazz'alabantzas a un'arbori  
de su tempus sinnau maistu,  
trott'e bentu ma in saludi  
in padenti ancor'abistu.*

*Oi ddi circu acculiu  
e ddi tendu beni sa manu,  
po intrai cun disigiu  
in custu giardinu sanu.*

*Scriendi su versu in rima  
in custu poetica terra,  
perdonu ddi circu prima  
a Cadeddu chi arru in erra.*

*No seu 'nu malu missu  
e ne mancu veteranu,  
chi mi donit su premissu  
domandu a su decanu.*

*Nascis in terra sinniesa  
de umilis traballantis,  
in tempus de poboresa  
tristu a tirai anantis.*

*Cun sacrificziu, sudori  
in domu t'ant studiau,  
cun impegnu e amori  
ti ses beni aplicau.*

*Po serbiri su Signori  
in custu vida terrena,  
oi supportas dolori  
po una di prus serena.*

*Oi ingiriau de bellus floris  
riccus de profumu nanta,  
t'allebiant cun is coloris  
is malis de sa tua planta.*

*T'ammiru su coraggiu  
sa forza e passienza,  
su surrisu messaggiu  
de gentilesa e clemenzia.*

*De cultura ses omini  
riccu, fort'in s'umiltadi,  
as abbrazzau s'Ordini  
cun alta capacidadi.*

*De dottu predicadori  
ti presentas in s'altari,  
de italianu oradori  
latinu e sardu impari*

*No ti mancant delicadesa  
poeta, sabiu, scrittori,  
a sa lingua campidanesa  
tui dd'has fattu onori.*

*Sempri attentu difensori  
De cudd'antigu connotu,  
po fama de connoscidori  
in Sardigna tui ses notu.*

*Peccau m'as annuddau  
cun su Sacramentu Santu,  
de don Cadeddu batiau  
di essi su primu mi bantu.*

*Cun sa vesti de candori  
a sa luxi m'has portau,  
ses prelau de valori  
po meritus chi has donau.*

*Cun custu scrittu sinceru  
ddu saludu e seliu,  
paxi, salud'in benideru  
cun Deus e asseliu.*